

İOANI SAMCI NAMAK' Bëšin əyit

Me namak'a şampi İoan İsusı c'ək'p'i p'as's'e şagirdxoxun soğone bake. Mo hat'e "İoanen şampi Mûq Xavar" saal Bibliına ən axırncı girk bakala "İoana qayesi əyit" girkurxo şampi İoane.

Alimxoy fikiren İoanen me namak'a həysət'in T'urşiya bakala Efesa, təxminən İsusı nanaxun bəkit'uxun 90 usen oşane şampe. Namak' Efesa şameşiyal bakayın, şo saycə efesluğoynak' nəəl maninesa vëbakalxoy cəmiyəteynak' təə, Mûq Xavara vëbaki İsusı q'abulbit'oğoynak' bit'ot'aynak'e şameşe.

İoan memiya ene yəşlu sa amdare. Şot'in iz namak'i boş sa ağsaq'q'al k'inək' vëbakalxo ük'e tast'a, şot'oğə İsusı yaq'en taysunast'a bëş c'eğala çətinluğxo hetər portbsuni barada maslaaxone tast'a. T'e vədə bakala cəmiyətxost'a İsusı nu q'abulbala, Şot'ay me dünyəne ham Buxačux, hamal sa amdar k'inək' eysuna nu vëbakala gele zombalxone buy. İoanen şot'oğoy əfci zomb-sunxo nu feret'baksuni yaq'moğone ak'est'a.

Girke boş əsəs p'ə fikire bu: vëbakalxoy suna ük'in çuresuna ak'est'un saal həmişə bakala Q'ončux İsusı me dünyəne sa amdar k'inək' eysuna q'abulbsun. İsusı q'abulbi çark'esun q'azayınşı amdarxoy bitot'in me p'ə fikirə əsəs

biq'alat'un. Şot'oğon me günaxkər dünyəne bakala sal sa şeyə nu tamaxbalat'un, axırı morox həmişəluğ tene. Ama İsusı şot'oğoy günaxxoy gala p'uri şot'oğə İz p'iyen os'ki taşt'un me dünyəne bakala hər şeyaxun üst'üne!

İoanen me namak'i boşal *İoanen səmpi Mıq Xavar* girke boş bakalt'ullarik' İsusə "yəşəyiş tadala Əyit" k'inək'e ak'est'a. Me Əyitə q'abulbalt'inal həmişəluğ yəşəyişəne haq'i baksa, şo hevaxt'sa lamandi biyaltayin hayzale, şot'o görə ki, Q'onçux içuxune! İsusə içuxun qoşbalt'in Buxaçuğone içuxun qoşbi baksa, İsusə çalxi q'abulbalt'in isə Buxaçuğə İşalayınşaki, Şot'ay yax tadi çark'esuna q'azayınşine baksa!

Girke boş bakalorox:

1:1-4 Yəşəyiş tadala Əyit

1:5-2:2 İşig q'a bayinq'luğ, günax q'a bağışlayınşaksun

2:3-14 Buxaçuğə çalxsun Şot'ay çureğalt'oğə əməlbsun upsune

2:15-17 Dünyənə mə çurekinan

2:18-27 Xrist'osi əleyinə bakalt'oğoy barada xavardarluğ

2:28-3:24 Buxaçuğoy əylux hesabbakalorox

4:1-6 İsus Xrist'osa nu çalxalo Buxaçuğoxun tene

4:7-21 Buxaçuğ - çuresune

5:1-5 Mə dünyənə q'alib hariyo

5:6-12 Buxaçuğoy Ğara çalxest'ala xib şahid

5:13-21 Həmişəluğ yəşəyiş

Yəşəyinş tadala Əyit

¹ Yan həysə hələ burqesunaxun baki, şot'o beş piin ak'i, ibaki q'a fikir tadi, şot'o beş kiin hisp'i Əyiti baradayan vəx p'ap'espun çuresa, manu ki yəşəyinş tadala Əyite. *

² Şo beşi aranene hari. Şo Bavaxun sagala baki, oşaal İçu yaynak' ak'est'i Yəşəyinşe. İsəəl me barada şahidluğbi vəxyan p'ap'espas. †

³ Yan beşi ak'it'oğoy q'a ibakit'oğoy barada vəx p'ap'esyanpsa ki, vənal yaxun soğə bakanan, hetər ki Yan Bavaxun q'a İz Ğar İsus Xrist'osaxun sayan.

⁴ Yan mot'o şot'aynak'yan same ki, vənal beş müqluğa şerik baki ‡ şot'o bol banan.

İşiğ q'a bayinq'luğ, günax q'a bağışlayınşaksun

⁵ Xrist'osaxun beşi ibaki isəəl yan vəx p'ap'esp'ala xavar mone: Buxaçux işiğe, Şot'ost'a sal sa bayinq'luğ butene.

⁶ Əgər yan "Buxaçuğoy yaq'enyan taysa" upsun bayinq'luğayan taranesa, t'e vədə əfçiyan əyitp'i baksa, serinaxunal əxilyan baksa.

⁷ Ama Buxaçux işiğa bakala k'inək' yanal işiğayan taranesa, t'e vədə beşi - me işiği boş tarak'alt'oğoy ük' sane baksa, Şot'ay Ğar İsusi p'iyenal beşi hər günaxa os'k'i taneşt'a.

⁸ Əgər uk'ayan ki, günaxsuzyan, yan yax əfçi duğıyan baksa, yast'al seri uk'ala şey tene baksa.

* **1:1 1:1** İoan. 1:1 † **1:2 1:2** İoan. 1:14 ‡ **1:4 1:4** beş müqluğa - bəzi şamurxost'a ef müqluğa

9 Ama beşi günaxxo ozane ext'ayan, Buxaçuğonal şot'oğö bağışlayınşı yax düzgün nu bakala hər şeyaxun təmizbəle.

10 Beşi "günax teyan əşp'est'e" upsunen isə Şot'o əfçiduğalyan c'evksa, Şot'ay piyorox yast'anu bakine baksa.

2

1 Ay bez baloox, mot'oğö vəynak' samezne ki, günax nu əşp'est'anan. Ama şinesa günax əşp'esaldayin, avabakanan ki, göynul bakala Bavay bəş beş baç'ane çurk'ale bu. Moval düzgün bakala İsus Xrist'ose.

2 Şo İç beşi günaxxo os'k'i taşala q'urbane - tək beşi təə, lap dirist' dünyəni. *

Buxaçuğö çalxsun Şot'ay çureğalt'oğö əməlsun upsune

3 Yan Şot'ay əmirxo əməlsunenyan Şot'o çalxsuna ak'est'es bakan.

4 Şiin "Şot'o çalezxsə" pi, ama Şot'ay əmirxo tene əməlsasa - şo əfçiduğale, seriyal şot'oxun əxile.

5 Şot'ay əyitə əməlbalt'in isə Buxaçuğoy çuresun k'ə baksuna ük'ine q'amişaki baksa. Metərлуğenal beşi Buxaçuğoxun sa baksunayan ak'est'a.

6 Şot'oxun sa baksuna uk'alt'in içü İsus Xrist'os k'inək' taşalane.

7 Ay zaynak' əziz bakalorox, vəynak' təzə sa əmir tez same, me əmirə vən İsusi yaq'en tağala

* 2:2 2:2 İoan. 4:10

ğınaxun avanan. Bisi əmir uk'at'an, mo efi ibakala zombsunxone.

⁸ Ama p'urumal, mo təzə əmire. Axırı şot'ay seri baksun Xrist'osast'a q'a vəst'a çoyele c'eysa. Mone, bayinq'luğ tanesa, ene seri işigene işigbsa! †

⁹ Şiin "işigi boşez yəşəyinşbsa" pi, ama iz viçə nifrətəbsasa, şo hələl bayinq'luğane.

¹⁰ İz viçə çureğalo isə işigi boşə yəşəyinşbsa, şot'oval ene hik'k'alən günaxaç zapi taşes tene baksə.

¹¹ Ama iz viçə nifrətbalo bayinq'luğane. Şo bayinq'luğane tarane, izi maya taysunal tene ava, şot'aynak' ki, bayinq'luğən şot'ay pulmoğə k'aç'i bene.

¹² Ay bezi baloox, zu vəynak'ez same, axırı efi bağışlayınşaksuna Şot'ay bit'oğoy galanan haq'i.

¹³ Ay bavoox, zu vəynak'ez same, axırı burqesunaxun Bakalt'u çalnanxi.

Ay cəyilxo, zu vəynak'ez same, axırı şər bakalt'u q'alibnan hari.

¹⁴ Ay bezi baloox, vəynak'ez şampi, axırı göynul bakala Bava çalnanxi.

Ay bavoox, vəynak'ez şampi, axırı burqesunaxun Bakalt'u çalnanxi.

Ay cəyilxo, vəynak'ez şampi, axırı Buxaçuğoy əyitə vəst'a efi turel möhk'əmnan çurpi, şər bakalt'uval ef turin oq'anan laxi.

Dünyənə ma çurekinan

† 2:8 2:7-8 İoan. 13:34

¹⁵ Dünyənə saal dünyəne bakala hik'k'ala ma çurekinan. Axırı me dünyənə çureğalt'ust'a Bavay çuresun butene.

¹⁶ Şot'aynak' ki, dünyəne bakala hər şey - amdara günaxaç taşala tamaxxo, puldeşiluğ, saal amdarxoy içoğoy bakalt'oğə q'a bit'oğə çoyel duğsun Bavaxun təə, me dünyənexune eysa.

¹⁷ Me dünyənə saal dünyəne q'iymətlü hesab-bakala şeyurxo çuresun c'ovaki-tanesa, ama Buxaçuğoy çureğalt'u əməlbalo həmişəluğə manst'a.

Xrist'osi əleyinə bakalt'oğoy barada xavardar-luğ

¹⁸ Ay bezi baloox, axırnci ğimxo p'ap'ene. Vən ibakenan ki, Xrist'osi düşməni † eğəlane. Həysəəl Xrist'osi əleyinə bakala gele amdare ene meydane c'ere. Mot'oxunal avayanbaks ki, axırnci ğimxo p'ap'ene.

¹⁹ Şorox beşi aranexun c'ert'un, şot'aynak' ki, beşi tet'unıy. Əgər həgigiyal beşi baki'tunıy, yaxunt'un mandoy. Ama tet'un mandı, mot'inal ak'esest'a ki, şorox beşi bakiyal tet'un.

²⁰ Ama İvel Bakalt'in vəx c'ək'p'i İvel Urufe tadi, vənal bitot'in serina avanan.

²¹ Metərluğən, zu vəynak' efi serina nu avabaksuna görə təə, şot'o avabaksuna görəz same; serinaxun əfci nu c'eysunal avanan.

† **2:18 2:18** Memiya exlət Buxaçuğoy əleyinə bakalt'uxune taysa. Şə dünyəni axırnci ğimxost'a hari Xrist'osi əleyinə tağalt'oğoy kalo bakale. (Bəğa: 2 Fes. 2; Qay. əyit 13).

22 P'oy əfçiduğal şuva? İsusı Buxaçuğoy C'ək'p'iyə § baksuna nu q'abulbala amdar! Metər amdar Xrist'osi düşməne: şot'in nə Bava, nə Ğara tene çalxsa.

23 Ğara nu çalxalt'in Bavaxunal əxil bakine baksə. Ğara çalxalt'in isə Bavaxun İša bakine baksə.

24 İsusı yaq'en tağala ğınaxun ibakit'oğə vəst'a efanan. Əgər şot'oğə vəst'a efaynan, vənəl Ğarast'a q'a Bavast'a mandalnan.

25 Şot'ay yax əyit tadiyo mone - həmişəluğ yəşəyinq!

26 Mot'oğə vəynək' vəx yaq'nuxun c'evksun çureğalt'oğəy baradaz şame.

27 Ef boş isə Buxaçuğon tadi İvel Urufe bu, şinesə vəx zombsunal eht'iyəc butene. Me İvel Urufen İçine vəx hər şeyə zombsə. Şot'in əfçi tene əyite, Şə həmişə serine. Şot'o görəl vəx zombi k'inək' Şot'ost'a mandanan.

Buxaçuğoy əylux hesabbakalorox

28 Metərлуğən, ay bez baloox, Şot'ay laxi yaq'axun ma c'ekinən ki, Şə qaybakat'an vən İz bəş ot'p'inut ük'lü çurpes bakanan.

29 Şot'ay düzgün baksuna avanansa, düzgün bakalt'u me dünyəne eçeriyoval Şə baksuna avanan.

§ 2:22 2:22 C'ək'p'iyə - yəni Xrist'os, amdarxoy günaxxo os'k'i taşt'eynak' Yaq'abakiyo.

3

¹ Bəğanan Bavan yax hetər çuresuna ak'est'e ki, yax İz əyloxe nex! Mo həgigiyal metərə! Me dünyənen isə yax tene çalxsə, axırı Şot'oval tene çalxi.

² Ay zaynak' əziz bakalorox, həysə yan Buxaçuğoy əyloxyan, oşa isə hetər bakalyan, hələ teyan ava. Saycə avayan ki, Xrist'os qaybakat'an yan Şot'ollarik' bakalyan, şot'aynak' ki, Şot'o hetər bune t'etər ak'alyan.

³ Şot'o me cürə umud bakalt'in içü pak bine baksa, axırı Şoval pake.

⁴ Günaxbalt'in k'anunane pozmuşbsə, şot'aynak' ki, günax əşp'est'un - k'anunsuzluğə.

⁵ Vən avanan ki, Xrist'os günaxxo os'k'i taşt'eynak'e hare. Şo İç isə günaxsuze.

⁶ Şot'ay yaq'en tağalt'in günaxa içuxun əxile bon. Günax əşp'est'unaxun kul nu haq'alt'in isə Şot'ay Şu baksuna nə q'amıştenebaksa, nə Şot'o çaltenexsa.

⁷ Ay bez baloox, bəğanan şuk'k'alən vəx maq'an ferett'i. Xrist'os düzgün bakalt'ullarik' düzgün əş biq'ala amdaral düzgünə.

⁸ Günaxaxun kul nu haq'ala amdar isə iblisaxune, axırı iblisənal burqəsunaxun günaxe əşp'est'a. Ama Buxaçuğoy Ğar hare ki, iblisi eşurxoy axıra duğane.

⁹ Xrist'osa q'abulbi yəşəyinş q'azayinşi amdaren günaxa içuxun əxile bon, şot'aynak' ki, içü yəşəyinş tadit'une oşq'ar. Axırı Buxaçuğon şot'o təzə yəşəyinşe tadi, şot'o görə şo günaxaxun əxile bakon.

¹⁰ Buxaçuğoy əyloğə iblisi əyloğoxun metərə c'ək'p'es bakan: düzgün əş nu biq'alo q'a iz viçə nu çureğalo Buxaçuğoxun tene.

Sun-suna çuresun

¹¹ İsusı əyitə ibaki ğinaxun Şot'in vəx tadi əmir mone: sun-suna çurekinan.

¹² İblisaxun bakala iz viçə bəsp'i K'ayin k'inək' ma bakanan! Şot'in iz viçə het'aynak'e bəsp'ey? Şot'o görə ki, iz əməlxo şərey, iz viçey əməlxo isə düzgüney.

¹³ Me dünyənen vəx nifrətbat'anal, ay bez viçimux, məət't'əl ma mandanan.

¹⁴ Yan beşi viçimoğoy çuresunaxun avayan ki, bisunaxun yəşəyinşayan c'ovake. Nu çureğalo isə hələ bisunaxun tene çark'eşe.

¹⁵ İz viçə nifrətbalo amdarbəsp'ale. Həmişəluğ yəşəyinşi amdarbəsp'alaxun əxil baksunal avanan.

¹⁶ Yan çuresuni k'ə baksuna Xrist'osen İz elmoğə beş gala tast'unaxunyan q'amışaki. Yanal suna viçimoğoy gala elmux tades bakala çuresunen çureğalayan.

¹⁷ Şinesa şaat' yəşəyinşbsun iz eht'iyəci boş bakala viçə ak'i şot'o gorox tene eysasa, Buxaçuğoy çuresun şot'ost'a hetərə bakes bakan?

¹⁸ Ay bez baloox, ekinan həgigi çuresuna saycə jomoxun c'əğala əyitmoğon təə, ama biq'ala əşurxon ak'est'en.

¹⁹⁻²⁰ Beşi Seri Bakalt'ay əylux baksuna metəryan avabaksa: yan yax günaxkər

hesabalbayan, Buxaçuğoy bəş beşi ük' arxayine baksa. Axırı Buxaçuğ kalane, hər şeyal avane.

²¹ Ay zaynak' əziz bakalorox, beş ük' təmizesa, Buxaçuğoxun beşi q'ibala ga tene bu.

²² Şot'oxun afırıpı k'ə çuryansasa, hayanq'sa, şot'o görə ki, Şot'ay əmirxo əməlyanbsa, İz piyes xoşel eğala əşurxoyan biq'sa.

²³ Şot'ay əmirəl mone: İz Ğar İsus Xrist'osa çalxi q'abulbsun, Şot'in yax əmirbi k'inək'əl sun-suna çuresun.

²⁴ Buxaçuğoy əmirxo əməlbala amdar Buxaçuğost'ane manst'a, Buxaçuğox şot'ost'a. Şot'ay yast'a manst'unal Şot'in yax tadi Urufaxunyan avabakes baksa.

4

İsus Xrist'osa nu çalxalo Buxaçuğoxun tene

¹ Ay zaynak' əziz bakalorox, hər əyitk'alt'u ma vəbakanan, şot'ay fikirxoy Buxaçuğoy urufaxun nəəl q'erəz sa urufaxun baksuna avabakseynak' şot'oğə yoxlayınşanan. Şot'aynak' ki, dünyəne gele əfçi xavareçalxone yəymişəke.

² İz əyit Buxaçuğoy Urufaxun bakalt'u mot'oxunnan çalxes bakan: İsus Xrist'osi amdar k'inək' eysuna q'abulbala uruf Buxaçuğoxune,

³ İsusə * nu q'abulbala uruf isə Buxaçuğoxun tene. Şot'ay əyitmoğə Xrist'osi düşmən bakalt'ine pest'a. T'e urufi eysuna ibakenan, ama şo ene me dünyənene.

* **4:3 4:3** *İsusə - bəzi şamurxost'a İsus Xrist'os amdar k'inək' eysuna*

⁴ Vəñ isə, ay bez baloox, Buxaçuğoxunnan, me əfçi xavareçalxoval q'alibnan hari, şot'aynak' ki, vəst'a Bakalo dünyəne bakalt'uxun üst'üne.

⁵ Şorox me dünyənexunt'un, mot'o görəl dünyəne bakalt'oğollarik't'un əyite, şot'oğoval içoğollarik' Buxaçuğoxun əxil bakalt'oğone ümüxlaxsa.

⁶ Yan isə Buxaçuğoxunyan. Buxaçuğocalxalt'inal yaxə ümüxlaxsa, Buxaçuğoxun nu bakalt'in isə yax tene ümüxlaxsa.

Hametəryan Seri Bakalt'u q'a əfçi bakalt'u c'ək'e.

Buxaçu - çuresune

⁷ Ay zaynak' əziz bakalorox, sun-suna çureğən, şot'aynak' ki, çuresun Buxaçuğoxune. İçust'a çuresun bakalo Buxaçuğoxune, Buxaçuğoval çalexsa.

⁸ İçust'a çuresun nu bakalt'in isə Buxaçuğotene çalxsa, axırı Buxaçu - çuresune.

⁹ Buxaçuğon İz çuresuna yax metərə ak'est'i: Şot'in İz tək sa Ğara dünyəne yaq'anebi ki, yax əsil yəşəyinq tadane.

¹⁰ Çuresun beşi Buxaçuğocalxaxun asulu tene. Çuresun - mo Buxaçuğon yax çuresi İz Ğara beşi günaxxo os'k'ala q'urban k'inək' yaq'absune.

¹¹ Ay zaynak' əziz bakalorox, Buxaçuğon yax me cürəne çuresasa, yanal suna haketər çureğalayan.

¹² Şuk'k'alən Buxaçuğotene ak'e. Ama beşi suna çuresunene yast'a bakala Buxaçuğocalxaxun.

ak'est'es bakon, Şot'ay çuresunal yast'ane çoyel c'eğon.

¹³ Şot'in yax İz Urufane tadi, mot'oxunal avayanbaksa ki, yan Şot'ost'a, Şoval yast'ane.

¹⁴ Yan beş piinyan ak'i, isəəl şahidluğyanbsa ki, Bavan İz Ğara me dünyəne Çark'est'al k'inək'e yaq'abi.

¹⁵ Şiin ki İsusə Buxaçuğoy Ğar pine q'abulbsa, Buxaçuş şot'ost'ane, şoval Buxaçuğost'a.

¹⁶ Hametərəl, yan q'amışaki q'abulyanbi ki, Buxaçuğon yax çuresa.

Buxaçuş - çuresune. Me dünyəne çuresunen yəşəyinşaloval Buxaçuğost'ane, Buxaçuşal şot'ost'a.

¹⁷ Ğeyin ğineyal çuresuni k'ə baksun beşi yəşəyinşəst'ane çoyel c'eyşa, şot'aynak'al Divan-bakala ğine Buxaçuğoy bəş ük'lü çurk'alyan, axırı Xrist'os hetəresa, yanal me dünyəne haketəryan.

¹⁸ Çuresunast'a q'ıyeynak' ga butene. Amdari boş bakala çuresunen q'ıya içuxun əxilebon, axırı cazina yaq'bəğalo iz ük'est'a q'ı bakalone. Q'ıbala amdarenal çuresuni k'ə baksuna tene q'amış.

¹⁹ Buxaçuğon yax İz çuresunane ak'est'i, isə yanal çuresuni k'ə baksuna q'amışaki şot'o ak'est'esyan baksa.

²⁰ "Buxaçuğə çurezsa" pi, ama iz viçə nifrətbalo - əfçiduğale. Axırı izi piin bəş bakala viçə nu çureğalt'in, izi sal sa vədə nu ak'i Buxaçuğə hetərə çureşes bakon?

21 Mone beşi Şot'oxun haq'i əmir: Buxaçuğ
çureğalt'in iz viçəl çureğalane!

5

Me dünyənə q'alib hariyo

1 İsusı Xrist'os* baksuna vëbakalo
Buxaçuğoxune. Bava çureğalt'in Şot'oxun
bakit'uval çuresa.

2 Beşi Buxaçuğoxun bakit'oğ çuresuna isə
mot'inyan ak'est'a: Buxaçuğ çuryansa, Şot'ay
əmirxoval əməlyanbsa.

3 Axırı Buxaçuğ çuresun Şot'ay əmirxo
əməlbsun upsune. Şot'ay əmirxo əməlbsun isə
çətin tene,

4 şot'aynak' ki, Buxaçuğoxun bakalt'oğon me
dünyəni şərə q'alibe eysa. Yax me q'alib eysuna
q'azayinşest'alo isə beşi vëluğə.

5 P'oy me dünyənə q'alib eğalo şuva? Saycə
İsusı Buxaçuğoy Ğar baksuna vë bakalo!

Buxaçuğoy Ğara çalxest'ala xib şahid

6 Xenen k'unuk'baki saal İz p'iya şipi
p'uriyo İsus Xrist'ose. Şot'ay eysun saycə
k'unuk'baksunen təə, İz p'i barst'unene baki.
Urufe mot'o şahidluğbalo, şot'aynak' ki, Uruf -
serine.

7 Metərluğen, xib şahide bu:

8 Uruf, xe saal p'i. Mot'oğoy xibarayal şahidluğ
sane.

* **5:1 5:1** Xrist'os - yəni C'ək'p'iyo, amdarxoy günaxxo os'k'i
taşt'eynak' Yaq'abakiyo

9 Yan amdarxoy şahidluğa q'abulyanbsa, ama Buxaçuğoy şahidluğ mot'oxun üst'üne, şot'aynak' ki, şahidluğbalo Buxaçuxe. Axırı Şot'in İçine İz Ğare barada şahidluğbsa.

10 Buxaçuğoy Ğara vëluğ bakala amdaren me şahidluğa iz ük'e boşe efsa. Ama Buxaçuğoy nu vëbakalt'in Şot'o əfçiduğale c'evksa, şot'aynak' ki, Buxaçuğon İçin İz Ğare barada bi şahidluğa tene vëbaksa.

11 Şahidluğ isə mone: Buxaçuğon yax həmişəluğ yəşəyinşə tade, me yəşəyinşal Şot'ay Ğaraxune eysa.

12 Ğara q'abulbit'ay yəşəyinşə bune, Buxaçuğoy Ğara nu q'abulbalt'ay isə yəşəyinşə butene.

Həmişəluğ yəşəyinşə

13 Mot'oğoy vëynak' - Buxaçuğoy Ğara q'abulbit'oğoynak'ez şame ki, vëst'a həmişəluğ yəşəyinşə baksuna avabakanan.

14 Şot'ay bəş çurpi k'ənesa çuresuna beşi ük' bune, şot'o görə ki avayan: beşi Şot'ay irəzilüən afırıpı çureğalt'oğoy inebaksa.

15 Şot'ay yax ibaksuna avayansa, beşi afırıpı çureğalt'oğoy ene yax tadi baksunal avayan.

16 Əğər vëxun sunt'in iz viçey günax əşp'est'una ak'ayın, ama me günax şot'o həmişəluğ yəşəyinşəxun əxil sakes bakala günax tenesa, t'e viçey çark'eseynak' afırıpanan, Buxaçuğonal şot'oxun həmişəluğ yəşəyinşə kam tene bal. Ama izi caza bisun bakala günaxal bune. Zu vëx metər günax əşp'est'it'aynak' afırıpısunə tez nex.

¹⁷ Pis niyəten biq'ala hər əş günaxe, ama hər günaxen yax İsusen tadi həmişəluğ yəşəyinşəxun əxil sakes tene bakan.

¹⁸ Avayan ki, Buxaçuğoxun bakalt'in günaxa içuxun əxilebon. Axırı şot'o Buxaçuğoxun Bakit'ine q'orişbsa, şər bakaloval şot'o laft'es tene baksa.

¹⁹ Beşi Buxaçuğoy əylux baksuna, me dünyə isə şər bakalt'ay kiin oq'a baksuna avayan.

²⁰ Buxaçuğoy Ğaren hari beşi pulmoğə qayepi, yanal İçu - Seri Bakalt'u çalyanxi. İsəəl yan Şot'ay - İsus Xrist'osi ak'est'i yaq'en taşi yax Şot'oxun sayan bsa. Şot'o görə ki, seri bakala Buxaçuş Şone, həmişəluğ yəşəyinşal Şot'oxune eysa.

²¹ Ay bezi baloox, əfçi buxaçuxxoxun əxil bakanan!

Udi Bible
Udi Scripture translation

copyright © 2020 Translation Services International Ltd. and Wycliffe Bible Translators, Inc.

Language: (Udi)

Contributor: Wycliffe Bible Translators, Inc.

All rights reserved.

2025-07-09

PDF generated using Haiola and XeLaTeX on 26 Jul 2025 from source files dated 9 Jul 2025

174556f0-71b4-5f1c-b512-2117b07ebbf0